



東坡先生尺牘十九卷目錄

子安兄七首

子明兄一首

史氏太君嫂一首

聖用弟三首

子由弟十一首

千乘姪一首

千之姪二首

付邁一首

付過二首

姪孫元老四首

胡郎仁脩三首

密州與人三首

徐州與人一首

湖州與人一首

黃州與人五首

登州還朝與鄉人一首

與人二首

翰林與黃州故人一首

揚州與人二首

揚州還朝與人三首

惠州與人一首

揚州與人三首

揚州還朝與人三首

北歸與人四首

目錄 終

此體與人四首

蘇州與人三首

蘇州與人三首

蘇州與人三首

蘇州與人三首

東坡先生尺牘十九卷

茂苑許自昌參閱

瑯琊焦竑批點

江夏黃居中訂正

與子安兄

黃州

近於城中得荒地十數畝躬耕其中作草屋數間謂之東坡雪堂種蔬接果聊以忘老有一大曲寄呈為一笑為書角大遠路恐被拆更不作四小哥二哥及諸親知書各為致下懇巢三見在東坡安下依舊似虎風節愈堅師授某兩小兒極嚴常親自煮豬頭灌血睛作薑豉菜羹宛有太安滋味此書到日相次歲猪鳴矣老兄嫂

東坡二刻 卷十九
團坐火爐頭環列兒女墳墓咫尺親眷滿目便是人間第一等好事更何所羨可轉此帑呈子明也近購獲先伯父親寫謝蔣希魯及第啓一通躬親裸背題跋寄與念二令寄還二哥因書問取

二 登州還朝

拜違十八年終未有省侍之期歲行盡但有懷仰卽日履茲寒凝尊體康勝姪男女各長成東塋每煩照管感涕不可言某到不旬日又有起居舍人之命方力辭免年歲間當請一鄉郡歸去漸謀退省耳未卽瞻奉萬乞以時自重

三

子由亦有司諫之命想不久到京東塋芟松甚煩照管如更合芟間告兄與楊五哥略往觀當分明點數根槎交付佃戶免致輒便偷砍也不然與出榜立賞名人告偷砍者亦佳一切告留意相度阿膠半斤真阿井水煎者青州貢棗五斤充信而已京師有幹乞示及

四 揚州還朝

十九郎兄弟遠至特蒙手誨恭審比來尊體佳

勝甚慰繫望骨肉久別乍聚問訊親舊但有感
歎知兄杜門守道爲鄉里推愛弟久客倦遊情
懷常不佳日望歸掃墳墓陪侍左右耳方暑敢
冀以時自重

五

往蒙示先伯父事迹但有感涕專在卑懷重承
誨諭惶悚之至正冗迫中不敢久留來使未暇
寫諸親知書乞爲致意非久徧發也

六

墓表又於行狀外尋訪得好事皆參驗的實石

上除字外幸不用花草及欄界之類才著欄界
便不古花草尤俗狀也唐以前碑文皆無告照
管模刻仔細爲佳不罪不罪

七

每聞鄉人言四九五九兩姪爲學勤謹事舉業
尤有功審如此吾兄弟不亾矣惟深念荷負之
重益自修飭乃是顏閔之孝賢於毀頓遠矣比
間五郎六郎乍失母毀痛難堪亦以此戒之矣
吾兄清貧遭此固不易處某亦爲一年兩喪困
於醫藥殞斂未有以相助且只令楊濟甫送二

東坡三效 卷十九
千爲一奠餘俟少暇也

與子明兄

黃州

兄才氣何適不可而數滯留蜀中此回必免衝替何似一入來寄家荆南單騎入京因帶少物來遂謀江淮一住計亦是一策試思之他日子孫應舉宦遊皆便也弟亦欲如是但先人墳墓無人照管又不忍與子由作兩處兄自有三哥一房鄉居莫可作此策否又只恐亦不忍與三哥作兩處也吾兄弟俱老矣當以時自娛世事萬端皆不足介意所謂自娛者亦非世俗之樂

但胸中廓然無一物卽天壤之內山川草木蟲魚之類皆是供吾家樂事也如何如何記得應舉時見兄能謳歌甚妙弟雖不會然常令人唱爲作詞近作歸去來引一首寄呈請歌之送長安君一盞呵呵醉中不罪

與史氏太君嫂

惠州

某謫海南狼狽廣州知時姪及第流落中尤以爲慶乃知三哥平生孝義廉靜自守嫂賢明教誨有方天不虛報也明日當渡大海聊致此書嫂知意而已

與聖用弟

俱揚州還朝

聖用小二秀才弟別後冗迫不卽奉書想未迂也此日體中佳安今日榜出且喜小十捷解喜慰之極此郎君爲學勤至文詞成就來春必殊等也前賀無疑向聞弟當復入來想必成行也小十甚安健日夕相見不用憂未相會間千萬保愛子由爲朝陵去未及奉書

二

十郎司理不及別作書初官但事事遵稟小二叔教誨官事勿苟簡公勤靜恕勿急求舉主曹

事辦集上官必不汝遺劉漕行父叔與之契舊因見但道此意俟到定州款曲作書也餘惟侍奉外多愛夜中目昏不成字勿訝勿訝

三

方叔兄未及拜書且爲致意子安三哥近有書未及再上狀因見亦爲致懇

與子由

黃州

或爲予言草木之長常在昧明間早起伺之乃見其拔起數寸竹笋尤甚夏秋之交稻方含秀黃昏月出露珠起於其根纍纍然忽自騰上若

推之者或綴於莖心或綴於葉端稻乃秀實驗之信然此二事與子由養生之說契故以此爲寄

二

黃州

子由爲人心不異口口不異心心卽是口口卽是心近日忽作禪語豈世之自欺者耶欲移之於老兄而不可得如人飲水冷暖自知死生可以相代禍福可以相共惟此一事對面相分付不得珍重珍重

三

黃州

任性逍遙隨緣放曠但盡凡心無別勝解以我觀之凡心盡處勝解卓然但此勝解不屬有無不通言語故祖師教人到此便佳如眼翳盡眼自有明醫只有除翳藥何曾有求明方明若可求卽還是翳固不可於翳中求明卽不可言翳外搖鼻息與土木同當恁麼時可謂無一毫思念豈可謂貓兒狗子已入佛地故凡學者但當觀心除愛自麤及細念念不忘會作一自得無所除弟以教我者是如此否因見二偈警策孔君不覺悚然更以問之書至此牆外有悍婦與

語甚惡

夫相毆詈聲飛灰火如猪嘶狗嗥因念他一點
圓明正在猪嘶狗嗥裏面譬如江河鑿物之性
長在飛沙走石之中尋常靜中推求常患不見
今日鬧裏忽捉得些子如何如何元豐六年三
月二十五日夜已封書訖復以此寄子由

四 黃州

某近絕少過從賓客知其衰懶不能與人為輕
重見顧者漸少殊可自幸昨旦偶見子華歎老
弟之遠外久之蒙見囑聞過必相告近者舉劉
太守一事體面極生不免有議論吾弟大節過

人而小事或不經意正如作詩高處可以追配
古人而失處或受嗤於拙目薄俗正好點檢人
小疵不可不留意也

五 杭州

明日兄之生日昨夜夢與弟同自眉入京行利
州峽路見二僧其一僧鬚髮皆深青與同行問
其向去災福答云向去甚好無災問其京師所
須要好朱砂五六錢又手擎一小卵塔中一舍
利兄接得卵塔自開其中舍利粲然如花兄與
弟請吞之僧遂分為三分僧先吞兄與弟繼吞

之各一兩拘細大不等皆明瑩而白亦有飛迸空中者僧言本欲起塔却吃了弟云吾三人肩各置一小塔便了兄言吾等三人便是三所無縫塔僧笑遂覺覺後噎噎然微似含物夢中甚明故閑報為笑

六

惠州

惠州市井寥落然猶日殺一羊不敢與仕者爭買時囑屠者買其脊骨耳骨間亦有微肉熟煮熱漉出不乘熱出則抱水不乾漬酒中點薄鹽炙微焦食之終日扶剔得銖兩於肯綮之間意甚喜之如

食蠮螬率數日輒一食甚覺有補子由三年食堂庖所食芻豢沒齒而不得骨豈復知此味乎戲書此紙遺之雖戲語實可施用也然此說行則眾狗不悅矣

七

惠州

人之所以生死未有不自然坎離者坎離交則生分則死必然之道也離為心坎為腎心之所以然未有不正雖桀跖亦然其所以為桀跖者以內輕而外重故常行其所不然者爾腎強而溢則有欲念雖堯顏亦然其所以為堯顏者以內

重而外輕故常行其所然者耳由此觀之心之性法而正腎之性淫而邪水火之德固如是也子產曰火烈人望而畏之水弱人望而侮之古之達者未有不知此者也龍者汞也精也血也出於腎而肝藏之坎之物也虎者鉛也氣也力也出於心而肺生之離之物也心動則氣力隨之而作腎溢則精血隨之而流如火之有煙汞有復反於薪者也世之不學道其龍常出於水故龍飛而汞輕其虎常出於火故虎走而鉛枯此生人之常理也順此者死逆此者仙故真人

之言曰順行則為人逆行則為道又曰五行顛

倒術龍從火裏出五行不順行虎向水中生有

隱者教予曰人能正坐瞑目調息握固定心息

微則徐閉之

達摩胎息法亦須閉若如法雖無經待其自止恐求不能到也

所念而卓然精明毅然剛烈如火之不可犯息

極則小通之微則復閉之

方其通時亦須一息一息歸之已下丹田

也為之惟數以多為賢以久為功不過十日則

丹田溫而水上行愈久愈溫幾至如烹上行如

水蔚然如雲蒸于泥丸蓋離者麗也著物而見

火之性也若目引於色耳引於聲口引於味鼻

引於香火輒隨而麗之今吾寂然無所引於外
火無所麗則將焉往水其所妃也勢必從之坎
者陷也物至則受水之性也而况其妃乎水火
合則火不炎而水自上則所謂龍從火裏出也
龍出於火則龍不飛而來不乾旬日之外腦滿
而腰足輕方閉息時常卷舌而上以舐懸癰雖
不能到而意到焉久則能到也如是不已則未
下入口方調息時則漱而烹之須滿口而後嚥
若未滿且留口仍以空氣送至下丹田常以意
中俟後次也養之久則化而爲鉛此所謂虎向水中生也此

論奇而通妙而簡決爲可信者然吾有大患平
生發此志願百十回矣皆悠繆無成意此道非
捐軀以赴之剗心以受之盡命以守之不能成
也吾今年已六十名位破敗兄弟隔絕父子離
散身居蠻夷北歸無日區區世味亦可知矣若
復繆悠於此真不如人矣故數日來別發誓願
譬如古人避難窮山或使絕域齧草啖雪彼何
人哉已令造一禪榻兩大案明窻之下專欲治
此并已作乾蒸餅百枚自二月一日爲首盡絕
人事饑則食此餅不飲湯水不嚼食物細嚼以

致津液或飲少酒而已午後略睡一更便臥三更乃起坐以待旦有日採日有月採月餘時非數息鍊陰則行今所謂龍虎訣爾如此百日或有所成不讀書著文且一時閣起以待異日不遊山水除見道人外不接客不會飲無益也深恐易流之性不能終踐此言故先書以報庶幾他日有慙於弟而不敢變也此事大難不知其果然不慙否此書既以自堅又欲以發弟也卷舌以舐懸癰近得此法初甚秘惜之此禪家所謂向上一路子千聖不傳人所見如此雖可笑然極有驗也但行之數日間舌下筋急痛常以漸馴致若舌尖果能及懸癰則致華池之水莫捷於此也又言此法名烘爐上一點雪宜自秘之

八

赴定州

某爲迫行事冗不及作孫子發書乞爲致意近者奏辟吏部胥子初妄執言本官係合入遠人礙辟舉條及反覆詰之廼始復云若今年九月二十七日日本官成資後別無遺闕卽不該入遠人可以奏辟某尋有公文申部乞會問本州卽見

東坡二卷 卷十九
得成資已前有無遺闕凡爭數日乃肯據狀會
同請與孫子發言略說與本州官員言早與果
決分明回一成資無遺闕文字來免爲猾胥妄
生枝節或更孫宣德與一願就及本州官員及
所填替非有服親一狀尤佳京師大抵官不事
事而吏橫也

九 北歸

子由弟得黃師是遣人齎來二月二十二日書
喜知近日安訊兄在眞州與一家亦健行計南
北凡幾變矣遭值如此可歎可笑兄近已決計

從弟之言同居賴昌行有日矣適值程德孺過

金山往會之并一二親故皆在坐頗聞北方事

有決不可往賴昌近地居者事皆可信人所報

擊者衆北行漸今已決計居常州借得一孫家

近決不靜爾宅極佳浙人相喜決不失所也更留眞十數日

便渡江往常逾年行役且此休息恨不得老境

兄弟相聚此天也吾其如天何然亦不知天果

於兄弟終不相聚乎士君子作事但只於省力

處行此行不遂相聚非本意甚省力避害也候

到定疊一兩月方遣邁去注官迨去般家過則

不離左右也葬地弟請一面果決八郎婦可用
吾無不可用也更破千緡買地何如留作葬事
千萬勿徇俗也林子中病傷寒十餘日便卒所
獲幾何遺臭無窮哀哉哀哉兄萬一有稍起之
命便具所苦疾狀力辭之與迨過閉戶治田養
性而已千萬勿相念保愛保愛今託師是致此
書

十 北歸

程德孺兄弟出銀二百星相借兄度手下尚未
須如此已辭之矣德孺兄弟意極佳感他感他

數日熱甚舟中揮汗寫此不及作諸姪書且伸
意夫人晚年更且慎護勿令少有疾副子孫意
五郎婦更與照管慰安之便令五郎往般挈也
八郎續親極好但吾儕難自言可託人與說今
師是已除太僕卿恐遂北行兄不能見又恐其
省母蘇州若見當令人探其意也少留真欲葺
房繕令整齊也五娘七娘近皆得書與孫皆安
胡郎亦有書來甚安行見之矣文九作書寫字
精好無勞問訊伯翁可喜符亦卓卓報二姊知

十一 北歸

東坡二集 卷十九 三
吾兄弟俱老矣當以時自娛此外萬端皆不足
介意所謂自娛者非世俗之樂但胷中廓然無
一物即天壤之內山川草木蟲魚之類皆吾所
樂事也

與千乘姪

黃州

廿二秀才別來又復春深相念不去心邁自北
還得手書見及數詩慰喜不可言日月不居奄
已除服哀念忽忽如何可言久不得鄉書想諸
叔以下各安子明微累想免矣因書略報大舅
書中甚相稱更在勉力副尊長意家門凋洛逝
者不可復如老叔固已無望而子明子由亦已
潦倒頭顱可知正望姪輩振起耳念此可不加
意未由會合千萬自愛

與千之姪

離黃州

必強姪近在泗州得書喜知安樂房眷子孫各
無恙秋試又不利老叔甚失望然慎勿動心益
務積學而已人苟知道無適而不可初不計得
失也聞姪欲暫還鄉信否叔舟行幾一年近於
陽羨買得少田意欲老焉尋奏乞居常見邸報
已許文字必在南都此行略到彼葬却老妣二

姨子由乾住二十來日却乘舟還陽羨姪能來

南都一見否叔甚欲一往見傳正自惟罪廢之

餘動輒累人故不果爾甚有欲與姪言者非面

不盡想不憚數舍之遠也寒暖不定惟萬萬自

愛

二 翰林

獨办不懼者惟司馬君實與叔兄弟耳萬事委
命直道而行縱以此竄逐所獲多矣因風寄書
此外勤學自愛近來史學凋廢去歲作試官問
史傳中事無一兩人詳者可讀史書為益不少

也

付邁

惠州

古人有言有若無實若虛况汝實無而虛者耶
使人謂汝庸人實無所能聞於吾者乃吾之望
也慎言語節飲食晏寢早起務安其形骸為善
也臨書以是告汝付邁

付過

惠州

詩有寫物之功桑之未落其葉沃若他木殆不
可以當此林逋梅花詩云疎影橫斜水清淺暗
香浮動月黃昏决非桃李詩也皮日休白蓮詩

東坡二刻 卷十九 十五
云無情有恨無人見月曉風清欲墮時決非紅
蓮詩此乃寫物之工若石曼卿紅梅詩云認桃
無綠葉辨杏有青枝此至陋蓋村學中語

二 儂耳

硯細而不退墨紙滑而字易燥皆尤物也吾平生無嗜好獨好佳筆墨既得罪謫海南凡養生且十無八九佳紙墨行且盡至用此等將何以自娛爲之慨然書付子過

與孫元老

俱儂耳

姪孫元老秀才久不聞問不識卽日體中佳否蜀中骨肉想不住得安訊老人住海外如昨但近來多病瘦瘁不復如往日不知餘年得相見否循惠不得書久矣旅况牢落不言可知又海南連歲不熟飲食百物艱難又泉廣海舶不至藥物鮓醬等皆無厄窮至此委命而已老人與過子相對如兩苦行僧爾胸中亦超然自得不改其度知之免憂所要志文但數年不死便作不食言也姪孫既是東坡骨肉人所觀看往京凡百加關防切祝切祝今有一書與許下諸子又恐陳浩秀才不過許只令付與姪孫切速爲

求便寄達餘惟萬萬自重不一

二

姪孫近來為學何如想不免趨時然亦須多讀史務令文字華實相副期於適用乃佳勿令得一第後所學便為棄物也海外亦粗有書籍六郎亦不廢學雖不解對義然作文極峻壯有家法二郎五郎見說亦長進曾見他文字否姪孫宜熟看前後漢史及韓柳文有便寄近文一兩首來慰海外老人意也

三

元老姪孫秀才屢得書感慰十九郎墓表本是老人欲作今豈推辭向者猶作寶月志文况此文義當作但以近日憂畏愈深飲食語默百慮而後動想喻此意也若不死終當作爾近來鬚鬢雪白加瘦但健啖啜如故耳相見無期惟望勉力進道起門戶為親榮老人僵仆海外亦不恨也

四

趙先輩儋人此中凡百可問而知也鄉里出百藥煎如收得可寄二三斤趙還時可附也無即

東坡二刻 卷十九 已

與胡郎仁修

俱北歸

某啓得彭城書知太夫人捐館聞間哀痛不已行役無便未由奉疏人至忽辱手書伏審攀慕之餘孝履粗遣至慰某本欲居常得舍弟書邀歸許下甚力今已決計泝汴至陳留陸行歸許矣旦夕到儀真暫留令邁一到常州款見矣未間惟節哀自重不宣

二

某慰疏言不意變故奄離艱疾伏惟孝誠深篤追慕痛裂荼毒難堪奈何奈何比日攀號愈遠摧毀何及伏惟順變從禮以全純孝某未獲躬詣靈帷臨書哽咽謹奉疏慰不次

三

小二娘知持服不易且得無恙伯翁一行並健得翁翁二月書及三月內許州相識書皆言一宅康安亦得九郎書二子極長進今已到太平州相次須一到潤州金山寺但無由至常州看小二娘有所幹所闕一一早來餘萬萬自愛

外生柳閱

北歸

東坡二刻 卷十九
展如外生人來得書知奉太夫人康寧新婦外
孫各無恙北歸萬里無足言者獨不見我令妹
賢妹夫此心如割介夫何負亦早世念之痛不
去心數年豈賢雋厄會耶相見當一慟以寫之
茲不一一

密州與人

違去門下已八年愚魯罷殆人事廢絕書疏缺
然怠慢之罪宜在譴絕比承柄用又不以時隨
衆修賀蓋疎懶愧縮日復一日不知復憐恕之
否卽日履茲寒凝台候萬福某去替止數月而
貧困難以赴闕相次乞江浙一郡若幸得之拜
見未可期惟冀爲國自重

二

浙右之別遂不上問至今想必察其情也特枉
書問感慰兼集比日起居何如涉海恬然繼以
提擢衆論翕然知忠信之可恃名實之相副也
雅故之未忻慰可量

三

前日使車道由郡下雖展接顏表殊慰瞻僚之
懷惟是禮勞不腆實深愧悚逮茲違間吏役絆

東坡二卷 卷十九 十九
櫻未皇奉書以伸綖綖之情特蒙高明遠矚珍
牘披繹數四感仰交懷初暑微熱切承跋履之
餘動止佳勝未緣會集臨紙增慨

徐州與人

州人張天驥隱居求志上不違親下不絕俗有
足嘉者近卜居雲龍山下憑高遠覽想盡一州
之勝當與君一醉他鄉慎勿忽忽去也

湖州與人

託庇隣封每荷存記特辱榮訊愧汗可量即日
履茲霜候起居住佳勝未緣參見惟日瞻企尚冀

以時珍衛區區

黃州與人

辱書承起居住佳勝奇墨吾儕共寶併蒙輟惠慚
悚之甚敬佩厚意也

二

示諭燕子樓記某於公契義如此豈復有所惜
况得託附老兄與此勝境豈非不肖之幸但困
躓之甚出口落筆爲見憎者所箋注兒子自京
師歸言之詳矣意謂不如牢閉口莫把筆庶幾
矣雖託云向前所作好事者豈論前後卽異日

東坡三妙 卷十九 二十
稍出災厄不甚爲人所憎當爲公作耳千萬哀
察

三

兩日瘡痛殊甚不果見辱簡且喜佳勝二詩高
妙讀之喜慰幸甚病中裁謝草草

四

兩日瘡痛不出思渴思渴今猶楚痛未已鍾乳
丸更求數服吐血者復作也不罪不罪

五

久不奉書疊承枉教字慰感良深比日起居住佳

勝汝郡務簡儒師清閑於此相從豈非幸甚區
區非面莫究令兄不敢別狀乞道懇

與鄉人

登州還朝

某去鄉十八年老人半去後生皆不識面墳墓
手種木已徑尺矣此心豈嘗一日忘歸哉久放
山澤乍入朝市張皇失次觸目非所好也但久
與子由別乍得一處不無喜幸然此郎君乃作
諫官豈敢望久留者相知之深故詳及一二

與人

辱教伏承尊體康勝某以拘文不克造請初不

東坡二卷十九
知微恙今聞已安愈甚慰馳仰然猶當信加保
愛也與入

三
違澗忽復周歲思仰日深衝涉薄冷起居清勝
卽獲瞻奉下情欣躍區區併遂面盡

翰林與黃州故人

某寵祿過分憂責至重顏衰鬢禿不復江上形
容也屢乞郡未得但懷想曩遊發於夢想也洗
眼揩牙藥得之甚幸切望掛意覆盆子必已採
得望多寄也都下有幹示及十二三兩先輩
各致區區忙甚未及書艾清臣亦然京師冗迫
殊不款曲也

揚州與人

欽服下風爲日久矣遲暮相從傾蓋如故非氣
類自然抑宿昔緣契也人來辱手教得聞起居
勝常堂上康福感慰深矣某凡百如故又得無
咎切磨知幸

二

久別思詠日深衰疾多故人事弛廢過蒙手書
存錄益用愧負比日起居住勝如聞已有名命

東坡二妙 卷十九
想卽超用以慰公論未間萬萬爲國自重

三

出守幸獲相聚每得見翛然忘懷爲益多矣別
來起居何如到揚人事紛紛坐想清游可復得
哉乍熱千萬保重

揚州還朝與人

吏役往還得見風采爲幸已多重承存錄延願
極厚感佩無量自別來一向冗迫不卽裁謝慙
負可知令子齋郎至領手教且審起居佳勝乍
此睽隔翹想日深尚冀珍調少慰鄙願

二

辱示長箋詞旨過重適少冗迫來使不敢久稽
未及占詞爲答想知照未甚訝也惶恐惶恐疊
蒙惠長松以扶老病感佩不可言天覺臨別亦
許寄來因到彼可爲督之藥名品方狀精詳之
極非故人留意之深何以及此未有以答厚意
但積悲感都下委示及餘面究

三

疊辱臨訪欲少款奉多事因循繼以臥病負愧
深矣知明日啓行無緣面別尚冀保練

東坡二刻 卷十九 三十三
惠州與人

累日欲上謁竟未暇辱教承足疾未平不勝馳
繫足疾惟葳靈仙牛膝二味爲末蜜丸空心服
必效之藥也但葳靈仙難得真者俗醫所用多
藥本之細者爾其驗以味極苦而色紫黑如胡
黃連狀且脆而不韌折之有細塵起向明示之
斷處有黑白暈俗謂之有鴿鴒眼此數者備然
後爲真服之有奇驗腫痛拘攣皆可已久乃有
走及奔馬之効二物當等分或視臟氣虛實加
減牛膝酒及熱水皆可下獨忌茶耳犯之不復
有効若常服此卽每歲收懷皂莢芽之極嫩者
如造草茶法貯之以代茗飲此効屢嘗目擊知
君疾苦故詳以奉白元素書已作稍暇詣見
此歸與人

遠枉書教存問甚厚兼審比來起居佳勝慰感
兼集寄示石刻仰佩至意何時會合少發所懷
臨書但有慨歎

二

某日望歸蜀耳終當過岐雍間徜徉少留以償
宿昔之意君自名臣子才美漸著豈復久浮沉

里中宜及今為樂異時一為世故所縻求此閑
適豈可復得耶偶記舊與彭二一詩讀之蓋淚
下也斯人有才而病廢故常多感慨可念可念
聊復錄此奉呈想亦為之惘然也

三

嶺海濶絕不謂生還復得瞻奉慰幸之極比日
履此秋涼起居住佳福少選到听即遂伏謁

四

某疲病加乏使令輒用手啓通問恃公雅度濶
略細謹耳然亦皇恐不可言也

十九卷終

東坡先生尺牘二十卷目錄

富道人二首

胡道師四首

陸子厚一首

鄧安道四首

何德順一首

辯才六首

參寥二十首

佛印十二首

南華辯老五首

通長老七首

大覺禪師三首

寶覺三首

淨慈明老五首

遵老三首

徑山二首

圓通禪師四首

祖印一首

聞復一首

寶月五首

南華明老三首

廣惠禪師二首

靈隱知和尚一首

泉老一首

言上人一首

幾演一首

開元明座主九首

無擇一首

清隱二首

浴室用公二首

大別才老三首

龜山長老四首

清涼長老一首

隆賢二首

代夫人與福應真

捨幡帖一首

付龔行信

目錄終

東坡先生尺牘二十卷

瑯琊焦竑批點

茂苑許自昌參閱

江夏黃居中訂正

與富道人

杭倅

某白道人富君辱書且喜體中安適比謂再相
見今既被命遂當北行乍遠諸事寬中保重

二 密州

承錄示祕方及寄遺藥具感厚意然此事本林
下無以遣日聊用適意可也若恃以為生則為
造物者所惡矣僕方苟祿出仕豈暇為此謹却
馳納且寄之左右或異日歸田却咨請感愧之

身城二刻 卷二十一
至千萬悉之不一不一

與胡道師

黃州

龐安常爲醫不志於利得法書古畫輒喜不自勝九江胡道士頗得其術與余用藥無以酬之爲作行草數紙而已且告之曰此安常故事不可廢也參寥子病求醫於胡自度無錢且不善書求余甚急余戲之曰子粲可皎徹之徒何不與下轉語作兩首詩乎龐二安常與吾輩遊不日索我於枯魚之肆矣

二

離黃州

昨日起離中途逆風吹往北听幾葬魚腹知之
二詩錄寄到後幸一兩字附遞至他州貴知達
玉芝善守護無爲有力者所取餘惟保愛

三

離黃州

乍別遠枉專使手書且審已還舊隱起居勝常
明日解舟愈遠萬萬以時自重

四

某啓再過廬阜俯仰十有八年陵谷草木皆失
故態栖賢開先之勝殆亾其半幻景虛妄理固
當爾獨山中道友契好如昔道在世外良非虛

東坡二刻 卷二
語道師又不遠數百里負笈相從秉燭相對恍如夢寐秋聲宿雲了然在吾目前矣幸甚幸甚

與陸子厚

惠州

某啓別來歲月及爾許也涉世不已再罹憂患但知自哂爾感君不遺手書殷勤如此且審道體安休喜慰之極惠州百凡不惡杜門養痾所獲多矣念君棄家求道二十餘年不見異人當得異書見許今春相訪果能踐言何喜如之舊過廬山見蜀道士馬希言似有所知今爲何在曾與之言否黃君高人與世相忘者如某與舍

弟何足以致之若得他一見予由礪錯其所未至則某可以弁受賜矣因足下致懇可得否韓朴處士多從傳同年游近傳得廣東漕幕遂帶得來此否因見亦道意羅浮鄧道士名守安專靜有守皆世外良友也世外之道金丹爲上儀鄰次之服食草木又次之而胎息三住爲本殆無出此者稽中散云守之以一養之以和和理日濟同乎大順然後蒸以靈芝潤以醴泉晞以朝陽綏以五絃僕今除五絃不用外其他舉以中散爲師矣適飲桂酒一栳醺然徑醉作書奉

東坡二刻 卷二十一
三
答真不勒字數矣桂酒乃僊方也釀桂而成盎
然玉色非人間物矣足下端爲此酒一來有何
不可但恐足下拘戒錄不飲爾道家少飲和神
非破戒也餘惟善愛不宣

與鄧安道

俱惠州

某啓郡中久留鶴馭時蒙道話多所開益幸甚
幸甚到山竊想尊體佳勝未卽款會但深渴仰
伏暑萬萬自重不宣

二

有人託尋一劉根道人者本撫州秀才今復安
在如知得去處且速一報切切山中芥藍種子
寄少許種之也

三

某啓近奉言笑甚慰懷企別來道體何如橋想
益督工何日訖事船橋尤不可緩不知已呼得
斫船人與商量未惟早定却爲妙此事不當上
煩物外高人但君以濟物爲心必不罪煎迫也
太守再三託致意不敢不達也未相會間萬萬
若時自重不宣

東坡四

卷二十一

四

曼山館

某啓一別便數月思渴不可言邇來道體何如
痔疾至今未除亦且放任不復服藥但却葷血
薄滋味而已寶積行無以為寄潮州酒一瓶建
茶少許不罪澆瀆乍涼萬萬保練不知鶴馭何
時可以復來郡城慰此士民渴仰之意達觀久
一喧靜何必拳拳山中也八月內且記為多采
何首烏雌雄相等為妙

與何德順

俱惠州

某白道上何君足下辱書并抱朴子小神丹方
極感真意此不難修製當即服餌然此終是外
物惟更加功靜觀也何苓之更長進後會無期
惟萬萬自重不宣

二

鄧先生聞入山後回如見為致意獨往真長策
也惟早決計

與辯才禪師

翰林

久不奉書愧仰增深比日切惟法履佳休某忝
冒過分碌碌無補日望東南一郡庶幾臨老復
聞法音尚冀以時為眾自愛

二 翰林

某尚與兒子竺僧名迨於觀音前剃落權寄緇
褐去歲明堂恩已奏授承務郎謹與買得度牒
一道以贖此子今附趙君齋納取老師意剃度
一人仍告於觀音前略祝願過悚息悚息

三 翰林

某有少微願須至仰煩切料慈照必不見罪某
與舍弟某捨絹一百疋奉為先君霸州文安縣
主簿累贈中大夫先妣武昌郡太君程氏造地
藏菩薩一尊并座及侍者二人菩薩身之大小
如中形人所費盡以此絹而已若錢少即省鏤
刻之工可也乞為指揮選匠便造造成示及專
求便船迎取欲京師寺中供養也煩勞神用愧
悚不已

四 杭州還朝

某啓法孫至領手教累幅伏承道體安康以慰
下情前此所惠書信皆領無狀每荷存記感作
亾已真贊更煩刻石甚愧不稱維摩贊近杜介
刻脫却數字好笑好笑唯金山石本乃是也信
口妄語便蒙印可罪過罪過聞老師益健更乞
倍加愛重且為東南道俗歸依也某衰病不復

有功名意此去且勉歲月纔得箇退縮方便卽
歸常州住也更告法師爲禱諸聖令早得歸爲
幸此是真切之意勿令人知將爲虛僞迫行冗
中不宣

五

潁州

某啓別來思仰日深比來道體何如幸於鬧中
抽頭得此閒郡雖未能超然遠引亦退老之漸
也思企吳越諸道友江山之勝不去心或更送
老請會稽一次老師必能爲此一郡道侶少留
山中勿便歸安養不肖更得少接清游何幸如

之惟千萬保重不宣

六

潁州

近日百事懶廢寢食之外頽然而已寫此數紙
書一似小兒逃學來人催迫日推一日相知惠
書皆不能答如相怪且爲道此意老病不足責
也

與參寥子

密州

某啓別來思企不可言每至逍遙堂未嘗不悵
然也爲書勤勤不忘如此仍審比來法體康佳
感服兼至三詩皆清妙讀之不釋手且和一篇

東坡二刻 卷二十一 七
爲答所要眞贊尚未作來人又不敢久畱甚愧甚愧知且伴太虛爲湯泉之遊甚善甚善某開春乞江浙一郡候見去處當以書奉約也要墨納兩笏皆佳品也餘惟爲法自重適有數客遠來相看陪接少暇奉啓不盡意

二

黃州

某啓去歲倉卒離湖亦以不一別太虛參寥爲恨留語與僧官不識能道否到黃已半年朋游稀少思念二公不去心懶且無便故不奉書遠承差人致問殷勤累幅所以開諭獎勉者至矣

僕罪大責輕謫居以來杜門念咎而已平生親識亦斷往還理故宜爾而釋老數公乃復千里致問情義之厚有加於平日以此知道德高風果在世外也見寄數詩及近編詩集詳味洒然如接清顏聽軟語也比已焚筆硯斷作詩故無緣屬和然時復一開以慰孤寂幸甚幸甚筆力愈老健清熟過於向之所見此於至道殊不相妨何爲廢之耶當更磨揉以追配彭澤未間自愛不宣

三

黃州

知非久往四明璉老且爲致區區欲寫一書爲
來人告還寫書多故懶倦容後便也僕有捨羅
漢一堂在育王山禪月筆也可一觀

四

黃州

聰師相別五六年不謂便爾長進詩語筆蹤皆
可畏遂爲名僧法足非特巧慧而已又聞今年
剃度可喜太虛只在高郵近舍弟過彼相見亦
有書來題名絕奇辨才要書其後復寄一紙去
然不須入石也黃州絕無所產又窘乏殊甚好
便不能寄信物去只有布一疋作臥單懷悚懷

悚

五

黃州

覽太虛題名皆予昔日游行處閉目想之了然
可數始予與辨才別五年乃自徐州遷于湖至
高郵見太虛參寥遂載與俱辨才聞予至欲扁
舟相過以結夏未果太虛參寥又相與適越云
秋盡當還而予倉卒去郡遂不復見明年予謫
居黃州辨才參寥遣人致問且以題名相示時
去中秋不十日秋潦方漲水面十里月出房心
間風露浩然所居去江無十步獨與兒子邁棹

東坡二刻 卷二十一 九
小舟至赤壁西望武昌山谷喬木蒼然雲濤際
天因錄以寄參寥使以示辨才有便至高郵亦
可錄以寄太虛也

六

潁州

兩得手書具審起居佳勝辨才遂化去雖來去
本無而情鍾我輩不免悽愴也今有奠文一首
并銀二兩託爲致茶果一奠之潁師得書且進
道紙尾待得閑寫去餘惟萬萬自重

七

潁州

某在潁一味適其自得也承惠家園新茗珍感
之至紫衣脚色已付錢今冬必得已託王晉卿
取附遞至智果也四公子亭他輩非吝但近日
人言尤可畏薄惡之甚故未可也必深悉此潁
上人道業必進託爲傳語聰公病懶不寫書不
訝不訝邁已赴河間來書續附去次少游近致
一場鬧皆羣小忌其超拔也今且無事閑知之

八

赴定州

某啓吳子野至出潁沙彌行草書蕭然有塵外
意決知不日潁脫而出不可復沒矣可喜可喜
近遞中附呂丞相所奏妙總師號牒去必已受

東坡二刻 卷二十一
訖卽日起居何如某來日出城赴定州南北當
又睽隔然請會稽之意終未已也更當俟年歲
間耳未會見間千萬善愛

某啓吳子野至辱書今又遣人示問併增感佩
畏暑伏惟法履清勝驚聞上足素座主奄化爲
之出涕竊惟教育成就義均天屬割慈忍愛如
何可言奈何奈何追念此道人茹苦含辛疇嘔
奉事豈有它哉求道故也雖寡文而守節疾邪
得師之一二欲更求此豈易得耶又幹蠱乏人
目前紛紛便及老師兩日念此爲廢飲食奈何

奈何達觀之人固有以處此更望爲道寬中自
愛不宣

九

定州

某啓紛紛久不奉書竊惟起居住勝呂丞相爲
公奏得妙總師號見託寄上此公着意人物至
於山水世外之士亦欲成就使之顯聞近奏王
子直處士之類公雖無用不可不領其意初不
相識而能相薦此又古人之事也秦少游作史
官亦稍見公議亦呂公薦也未由會合千萬自
重

十

南遷

彌陀像甚圓滿非妙總留意安能及此存沒感荷也公欲留施如何不便留下今既賫至此長大難得人肯附去輒已帶行欲作一贊題記捨廬山一大刹爾

十一

南遷

頽上人知學道長進甚善甚善鍾和尚奄忽哀苦不易不別書奉慰惟節哀勉力寬老和尚心宜與兒子處支米十石請用鍾和尚念佛追福也

十二

南遷

某垂老再被嚴譴皆愚自取無足言者事皆已往譬之墜甑無可追計從來奉養陋薄廩入雖微亦可供麤糲又子由分俸七千邁將家大半就食宜與既不失所外何復挂心實脩然此行已達江上耳目清快幸不深念知識中有憂我者以是語之紗裹肚鞵各一致區區而已英州南北物皆有某一飽之外亦無所須承問所幹感懼而已

十三

南遷

某啓辱書感慰之極目病已平復某雖衰老遠
徙亦且凡百如昨不煩深念但借譽過當非所
安全不肖者勿遣異人聞此語也呵呵

十四

南遷

參寥失鍾師如失左右手不至大段煩惱否且
多方解之仍與衆善處院門事也後會何日千
萬自愛寫書多不謹

十五

惠州

海月真贊許他二十餘年矣因循不作因來論
輒爲之不及作慧淨書幸付與此本也表忠觀
記及辨才塔銘後來不見入石必是僕與舍弟
得罪人未敢便刻也此真贊更請參寥相度如
未可且與藏公處也

十六

惠州

某啓專人來辱手書并示近詩如獲一笑之樂
數日慰喜忘味也某到貶所半年凡百粗遣更
不能細說大略只似靈隱天竺和尚退院後却
住一箇小林院子拆足鑄中菴糙米飯便喫過
一生也其食痛病人北方何嘗不病是病
皆死得人何必瘴氣又苦無醫藥京師國醫手

衰死漢尤多參寥聞此一笑當不復憂我也故人相知者卽以此語之餘人不足與道也未會合千萬爲道自愛

十七

惠州

賴沙彌書跡巉聳可愛他日真妙總門下龍象也老夫不復止以詩句字畫期之矣師年紀不小尚畱情句畫間爲見戲乎然此迴示詩超然真遊戲三昧也居閒不免弄筆硯見索書字要楷法輒奇偉感激感激轉海相訪一段奇事但聞海舶遇風如在高山上墮深谷中非愚無知

與至人皆不可處胥靡遺生恐吾輩不可學若是至人無一事冒此嶮做什麼千萬勿萌此意賴師喜於得預乘桴之游所謂無所取材者其言切不可聽相知之深不可不盡道其實耳自揣餘生必須相見但記此言非妄語也

十八

惠州

慧淨琳老及諸僧和因見致懇知爲默禱於佛令亟還中州甚荷至意自揣省事已來亦粗知道者但道念屢起數爲世務所移恐是諸佛知其難化故以萬里之行相調伏耳少游不憂其

不了此境但得他老兒不動懷則餘不足云也
俞承務知為少游展力此人不凡可喜今有一
書與之告與轉達仍已有書令兒子輩準備信
物令送去俞託求穩當船主附與廣州何道正
也見說自有斤重脚錢數目體例甚熟

十九

惠州

惠州近城數小山類蜀道春與進士許毅野步
會意處飲之且醉作詩以紀適參寥使使欲歸
使持此以示西湖之上諸友庶使知余未嘗一
日忘湖山也

二十

北歸

某病甚幾不相見兩日乃微有生意書中肯意
一一領但不能多書歷答也見知識中病甚垂
死因致仕而得活者俗情不免効之果若有應
其他不恤也遺表千萬勿刻無補有害也

與佛印

黃州

歸宗化主來辱書方欲裁謝栖賢遷師處又領
手字眷與益勤感忤無量數日大熱緬想山間
方適清和法體安穩雲居事迹已領冠世絕境
大士所廬已難下筆而龍君筆勢已自超然老

拙何以加之幸少寬假使得款曲抒思也昔人一涉世事便爲山靈勒回俗駕今僕蒙犯塵垢垂三十年困而後知返豈敢便點浣名山而山中高人皆未相識而迎許之何以得此豈非宿緣也哉向熱順時自愛

二

黃州

收得美石數百枚戲作怪石供一篇以發一笑開却此例山中齋粥今後何憂想復大笑也更
有野人於墓中得銅盆一枚買得以盛怪石并送上結緣也

三

離黃州

辱書伏承道體安佳甚慰馳仰見約遊山固所願也方迫往筠州未卽走見還日如約忽忽布謝

四

離黃州

專人來辱書累幅勞問備至感忤不已臘雪應時山中苦寒法體清康一水之隔無緣躬詣道場少聞謦款但深馳仰

五

離黃州

夢想高風忽復披奉欣慰可知但累日煩擾爲

愧耳重承人船相送益用感忤別來法體何如
後會不遠萬萬保練

六

離黃州

專人來復書教并偈捧讀慰喜且審比日法體
安穩幸甚幸甚今聞秀老赴名爲衆望公來長
蘆如何如何某方議買劉氏田成否未可知須
更畱數日攜家入山決矣殤子之戚亦不復經
營惟感覺老憂愛之深也太虛已去知之

七

翰林

經年不聞法音徑術荒澁無與鋤治忽致手教

累幅稍覺洒然仍審比來起居住勝行役二年
水陸萬里近方弛擔老病不復往日而都下人
事十倍於外吁可畏也復欲如去年相對溪上
聞八萬四千偈豈可得哉南望山門臨書悽斷
苦寒爲衆珍重

八

翰林

阻隔忽復歲暮忽枉教翰具審法履佳勝久不
至京只衰疾倦於遊從無有會晤之日惟冀良
食自愛煩置白掛甚愧厚意賜茶五角聊以將
意餘冀倍萬保練

九 翰林

人至承誨示知儗裝取道會見不遠豈勝欣慰
向冷跋涉自愛

十 翰林

治行草草不復上問忽奉手筆曠若發蒙且審
比日戒體輕安又承退席雲臥尤仰高風也未
緣展晤引跂尤劇

十一 翰林

久不奉書忽辱惠教具審徂暑戒體輕安承有
金山之召應便領徒東來叢林法席得公臨之

與長蘆對峙名壓淮右豈不盛哉渴聞至論當

復咨叩惟早趣裝途中善愛

十二 翰林

塵勞袞袞忽得來書讀之如蓬蒿藜藿之逕而
聞警欬之音可勝慰悅且審即日法履輕安又
重以慰也某蒙恩擢寘詞林進陪經幄是為儒
者之極榮實出禪師之善禱也餘熱千萬自重

與南華辨老 俱惠州

某啓竄逐流離愧見方外之舊達觀一視延館
加厚洗心歸依得見祖師幸甚幸甚人來辱書

具審法體佳勝感慰兼集某到惠已百日杜門
養痾凡百粗遣不煩留念蒙致子由往來書信
異鄉隔絕得聞近耗皆法慈垂卹知幸知幸未
由面謝惟冀千萬爲衆保練不宜

二

筠州書信已領足兼蒙惠麩粉瓜薑湯茶等物
意兼重感忤不已柳碑庵銘並佳貺也卓錫泉
銘已寫得并碑銘並附去鐘銘子由莫終當作
待更以書問之紫菜石髮少許聊爲芹獻陋邦
乃無一物愧忤却有書一角信卷三枚竹筒一

枚封全并寄子由不免再煩差人送達慙悚之
至

三

某啓正月人還曾上問必達此日法履何如某
到貶所已半年凡百隨緣不失所也毋慮毋慮
何時會合悵仰不已乍暄萬萬爲衆自重不宜

四

程憲近過此往來皆款見程六程七皆得書甚
安子由亦時得書無恙也又遷居行衙極安穩
有樓臨大江極軒豁也知之知之

東坡二集 卷二十一
五
某頓首淨人來辱書具審法體勝常深慰馳仰
至此二年再涉寒暑粗免甚病但行館僧舍皆
非久居之地已置圖築室爲苟完之計方斫木
陶瓦其成當在冬中也九月間兒子般挈南來
一禮祖師遂獲瞻仰爲幸也伏暑中萬萬爲衆
自重不宣

六

遠承差人寄示諸物等一一荷厚意也兒子被
仁化令想與南華相近也謫居窮陋無可爲報
益不遑也

七

某啓人至辱書具審法履清勝至慰至慰忽復
歲盡會合無期自非道力深重不能無異鄉之
感也新春惟冀若時自重

八

某近苦痔疾極無聊看書筆硯之類殆皆廢也
所要寫王維劉禹錫碑未有意思下筆又觀此
二碑格力淺陋非子厚之比也張惠蒙到惠幾
不救近却已安矣不煩留念寄拄杖甚荷雅意

東坡二刻 卷二十一
此木體用本自足何用更點綴也呵呵適合人
客書不盡所懷續奉狀也正輔提刑書告便差
人達之內有子由書也

九

某啓久不聞問忽辱專使手書具審比來法體
佳勝生日之餉禮意兼重庶緣道力少安晚境
乎銘佩之意非筆舌可究披晤未期惟萬萬爲
法自重不宣

十

某再啓所要寫柳碑大是山中闕典不可不立
石已輟忙揮汗寫出乃作一小記成此一事小
生結緣於祖師不淺矣荒州無一物可寄只有
枕椰杖一枚木韌而堅可採勿笑舍弟及聰師
等書信頗足此自有去人已發書矣張惠蒙去
歲爲看船不得禮拜祖師及衣鉢甚不足今因
來人令相照管一往不訝喧聒此子多病來時
告令一得力庄客送廻也留住五七日可矣

十一

學佛者張惠蒙從予南遷予遊南華使惠蒙守
舟明年六月南華禪師使人於惠惠蒙曰去歲

觀坡
此言
豈澹
老前

不得一禮祖師叅辨公乃可恨欲與是人俱往
請留十日而還予嘉其意許之且令持此請教
誨於辦公可痛與提耳也紹聖二年六月十一
日令一書八五容以歐也留卦正十日可矣
不八十二與言一公不荷國部此下之說不
近日營一居止苟完而已蓋不欲久留占行衙
法不得久居民間又無可僦賃故須至作此久
忝侍從囊中薄有餘貲深恐書生薄福難蓄此
物到此已來收葬暴骨助修兩橋施藥造屋務
散此物以消塵瘴今則索然僅存朝暮漸覺此
身輕安矣示諭恐傳者之過材料工錢皆分外
供給無毫髮干撓官私者知之免憂此言非道
友相愛誰肯出此感服之至歲盡會合何日臨
紙悵惘

十三

專人遠來獲手教累幅具審法履佳勝感慰兼
集又蒙遠致筠州書信流落羈寓每煩淨眾愧
佩深矣承惠及罌粟鹹豉等益荷厚意泉銘模
刻甚精某此百凡如宜不煩念及未由瞻謁懷
想不已熱甚惟萬萬爲眾自愛

東坡二刻 卷二十一
與通長老

密州

某啓近過蘇臺不得一見而別深爲耿耿專人來辱書且喜法履清勝某到此旬日郡僻事小足養衰拙然城中無山水寺宇朴陋僧皆麓野復求蘇杭湖山之遊無復髣髴矣何日會集慰此牢落唯萬萬自重人還布謝

二

密州

某啓別後一向忙冗有疎奉問疊辱手字愧悚良深仍審履茲初涼法體增勝爲慰承開堂未幾學者日增吾師久安閑獨迫於衆意無乃少勞然以濟物爲心應不計勞逸也未緣奉謁千萬珍重人還布謝

三

密州

姚君篤善好事其意極可佳然不須以物見惠也惠香八百罐却託還之已領其厚意與收留無異實爲他相識所惠皆不留故也切爲多多致此懇千萬勿訝勿訝

四

密州

且說與姚君勿疑訝只爲自來不受非親舊餽恐他人却見恠也元伯昆仲各爲致懇乍到未

及奉書

五

杭州還朝

人至辱手書感佩至意且審比來法候佳勝衰
病歸興日深昨日忽召還禁林殊異所懷已辭
免乞郡然須至起發前路聽命也勞生紛紛未
知所歸宿臨書慨歎會合無時千萬爲衆自愛
迫行紛然幸恕不謹

六

杭州還朝

示諭石刻浙中好事者多爲之老人亦爾耶呵
呵惠茶感刻倉卒中未有以報此方有所須可

示及也大覺正月一日遷化必已聞之同增悵
悼某却與作得宸奎閣記此老亦及見之事忙
未及錄本寄去想非久必自傳到也

七

杭州還朝

某啓此來浙中逾年不一展奉豈勝悵惘辱書
具審法履佳勝感慰兼集衰病日侵百念灰冷
勉強歲月間歸安林下矣聞老師住持安穩遂
可送老甚喜甚喜會合無時臨書慨然惟千萬
爲衆自愛不宣

八

杭州還朝

惠茶極為精品感抃之至長松近出五臺治風甚効俗云文殊指示一僧乃始識之今納少許并人參四兩可以此二物相對入少甘草不可多并腦子作湯點佳送去御香五兩不訝晚瀆

與大覺禪師

杭倅

某啓人至辱書伏承法候安裕傾向傾向昨奉聞欲捨禪月羅漢非有他也先君愛此畫私心以為捨施莫如捨所甚愛而先君所與厚善者莫如公又此畫頗似靈異累有所覺於夢寐不欲盡談嫌涉恠耳以此亦不欲於俗家收藏意

止如此而來書乃見疑欲換金水羅漢開書不覺失笑近世士風薄惡動有可疑不謂世外之人猶復爾也請勿復談此某比乏人可令齋去兵卒之類又不足分付告吾師差一謹幹小師齋籠杖來迎取并古佛一軸亦同捨也錢塘景物樂之忘歸舍弟今在陳州得替當授東南幕官冬初恐到此亦未甚的詩筆計益老健或借得數首一觀良幸到此亦有拙惡百十首閑暇當錄上

二 杭州

東坡二刻 卷二十一 三十五
某啓奉別二十五年幾一世矣會見無時此懷
可知到此欲奉書因循至今辱書具審起居安
穩南方耆舊彫落惟明有老師杭有辨才道俗
所共依仰益一時盛事比來時得從辨才遊老
病昏塞頗有所警發恨不得一見老師更與鑽
磨也歲暮山中苦寒千萬爲衆自重不宣

三 杭州

要作宸奎閣碑謹以換成衰朽廢學不知堪上
石否見參寥說禪師出京日英廟賜手詔其略
云任性住持者不知果有否如有却請錄示欲
添入此一節切望仔細錄到即便添入仍大字
寫一本付侍者齋歸上石也惟速爲妙碑上刻
作一碑首如唐已前制度刻字額十五字仍刻
二龍夾之碑身上更不寫題古制如此最後方
寫年月換人銜位姓名更不用著立石人及在
任人名銜此乃近世俗氣極不典也下爲龜趺
承之請令知事僧依此

與寶覺禪老

密州

某啓去歲赴官迫於程限不能艤舟一別中流
縱望雲山杳然有不可及之歎旣渡江遂蒙輕

舟見餞復得笑語一餉之樂慚荷之懷殆不可
勝言別來因循未及奉書專人至辱教累幅慰
諭反覆讀之爽然如對妙論仍審比來法履佳
勝某此粗遣但未有會見之期臨書惘然惟萬
萬自重至遊堂記卽當下筆遞中寄去近有後
祀菊賦一首寫寄以當一笑人還草草不宣

二

密州

圓通不及別書無異此意告轉求此紙東州僧
無可與言者况欲聞二大士之謦欬何可復得
耶此語合喫幾拄杖刁丈計自太平歸安勝屢

有書去不知達否因見道下懇焦山綸老亦爲
呼名

三

杭州

明守一書託爲致之育王大覺禪師仁廟舊所
禮遇嘗見御筆賜偈頌其略云伏覩大覺禪師
其敬之如此今聞其困於小人之言幾不安其
居可歎可歎太守聰明老成必能安全之願因
話款曲一言正使凡僧當以仁廟之故加禮而
况其人道德文采推重一時乎此老今年八十
二若不安安全當使何往恐朝廷聞亦未必喜也

東坡二效 卷二十一 二十七
某方與撰宸奎閣記旦夕附去公若見此老且與致意千萬千萬

與淨慈明老

俱杭州

某啓近辱臨訪紛冗不遂款接愧企無量比日道體何如法涌赴闕道俗一意言欲公嗣此道場緣契已定想更臨屈副此試仰餘非面莫究不宣

二

某啓人還承書蒙峻拒不識道眼有何揀擇深所未諭也衆意甚堅雖百却不已幸早戒途卽

見不復覩縷

三

衆詣漕臺敦請已許爲行下相次新太守過此當力求之亦必勸吾師豈能盡違之耶至時不免來此不如今日赴衰病之請却非情也

四

法涌始者甚不欲赴法雲而張尉之請旣堅遂不能違亦云緣契在彼非力辭之可免法涌旣不得免則吾師今者亦必無緣辭避幸便赴衆心毋煩再三也欽企欽企

五

某啓辱書知不違衆願卽當西渡喜慰之至比日法履康勝某雖被旨去郡尤能少留及見升堂聞第一義也謹奉手啓攀迎不宜

與遵老

俱杭州

某啓前日壁間一見新偈便向泥土上識君今日復蒙古藤奇句益知前言之不妄也幸甚幸甚然既傳之諸祖何不自家留使既已倒持輒當逆化呵呵人還忽忽不一不一

二

某啓疊辱手教具審法體佳勝扇子鈔句開發良多欲攀和恐久立大衆呵呵人還忽忽復謝不宜

三

某啓前日辱臨屈既已不出無緣造謝信宿想惟法體佳勝筠州茶少許漫納上并利心肺藥方呈范醫昨呼與語本學之外又通歷筭甚可佳也謹具手啓不宜

與徑山維琳

俱北歸

某臥病五十日日以增劇頽然待盡矣兩日始

東坡二刻 卷二十一
微有生意亦未可必也適睡覺忽見刺字驚歎
久之暑毒如此豈耆年出山旅次時耶不審比
來眠食何似某扶行不過數步亦不能久坐老
師能相對臥談少頃否晚涼更一訪憊甚不謹
某嶺海萬里不死而歸宿田里遂有不起之憂
豈非命也夫然死生亦細故爾無足道者惟爲
佛爲法爲衆生自重

與圓通禪師

俱黃州

某聞名已久而得公之詳莫如魯直亦如所論
也自惟潦倒遲莫年垂五十終不聞道區區持
其所有欲以求合於世且不可得而况世外之
想望而不之見者耶不謂遠在音問推譽過當
豈非醫門多疾息黥補劓恃有良藥乎未脫罪
籍身非我有無緣頂謁山門異日聖恩或許歸
田當畢此意也

二

屏居亦久親識斷絕故人不棄眷予加厚每辱
書問感愧不可勝言僕凡百如舊學道無所得
但覺從前却是錯耳如何如何

東坡二卷
卷二十一
某啓別後蒙五惠書三遣化人不肖何以當此
熱毒殊甚且喜素履清勝某尚以少事留城中
數日然度不能往見矣瞻望山門臨紙惋悵惟
千萬爲道自重而已揮汗走謝幸恕不謹

四

某啓謫居窮僻懶且無便書問曠絕故人不遺
兩辱手教具審比來法體甚輕安感慰深至僕
晚聞道照物不明陷于吏議愧我道友所幸聖
恩寬大不卽誅極想亦大善知識法力冥助也

自絕祿廩因而布衣蔬食於窮苦寂淡之中却
粗有所得未必不是晚節微福兩書開諭周至
常置左右也未緣展謁萬萬以時自重因使人
還附啓起居

與祖印禪師

某啓昨夜清風明月過蒙法施今又惠及幽泉
珍感珍感木湯法鼓恐濁却妙供謹以回納不
一不一

與開復師

杭州

某啓辱書并詩誦味不釋手感慰之極比日起

東坡二刻 卷二十一
居何如示諭欲以高文發明儒釋固所望于左
右也某數日病在告今日頗快來日欲出視事
然尚力粗和得來詩未能盡意花殘不難得但
去人已負重後信當致也詩中似欲之未相見
間萬萬自愛

與寶月大師

杭侔

某啓久不奉書益冗情相因必未訝也史厚秀
才及蔡子華處領來書喜知法體佳勝此中並
安請補外蒙恩除杭侔且夕出京往陳州相聚
至九月初方行愈遠鄉里曷勝依黯累示及瑜

隆紫袍師號近爲干得王詵駙馬奏瑜爲海慧
大師文字更旬日方出圓覺經云法界海照了
諸相文潞公亦許奏隆紫衣然須俟來年遇聖
節方可奏已差祠部吏人到王駙馬宅計會與
瑜師文字纔得卽入遞次莫更一兩月方得勅
出此事自難得偶成此二事也臨行草草不盡
所懷惟千萬珍重

二

杭侔

屢蒙寄紙糖一一愧荷駙馬都尉王晉卿畫山
水寒林冠絕一時非畫工所能彷彿得一古松

東坡二刻 卷二十一 三十一
帳子奉寄非吾兄別識不寄去也幸秘藏之亦
使蜀中工者見長意思也他甚自珍惜不妄與
人畫知之

三

黃州

某啓近遞中兩奉書必達新歲遠想法體康勝
無緣會集悵望可量屢要經藏碑本以近日斷
作文字不欲作既來書丁寧悟清日夜煎督遂
與作得寄去不嫌罪廢卽請入石碑額見令悟
清持書往安州干滕元發大字不知得否其碑
不用花草欄界只鐫書字一味已有大字額向
下小字但直寫文詞不須寫大藏經碑一行及
書撰人姓名卽古雅不俗切祝切祝又有小字
行書一本若有工夫入小橫石亦佳黃州無一
物可爲信建茶一角子勿訝塵浼

四

黃州

此間諸事請問清師卽詳也清久游外方練事
多能可喜可喜海惠及隆大師各惟安勝每念
鄉舍神爽飛去然近來頗常齋居養氣日覺神
凝物輕他日天恩放停幅巾杖屨尚可放浪於
岷峨間也知吾兄亦清健髮不白更請自愛晚

東坡二刻 卷二十一 三十三
歲爲道侶也餘附清師口陳此不覲縷

五

黃州

某有吳道子絹上畫釋迦佛一軸雖破爛然鈔迹如生意欲送院中供養如欲得之請示一書卽爲化記并求的便附去可裝在板子上仍作一龕子此畫與前來菩薩天王無異但人物小而多爾

與南華明老

俱北歸

某啓衰病復過南華深欲一別祖師因見仁者遽辱專使惠手書何慰如之卽日履此薄寒法體佳勝旦夕離英但江路頗寸進不卽會見企望之極惟萬萬爲衆自重不宣

二

某流浪臭濁久矣道眼多可傾蓋如舊清遊累日一洗無餘幸甚幸甚專使惠手書具聞別後法體安穩爲慰多矣贛上待水猶更旬浹南望山門馳神杳藹更希若時爲衆保練不宣

三

某以促裝登舟冗甚作書極草草寵示四偈可謂奇特聊荅四句想大笑也石刻已領感感潘

東坡二效 卷二 三十四
生果作墨否如成寄一丸伯固念親懷歸甚矣
道話解之

與東林廣惠禪師

俱翰林

示諭臂痛示與衆生同病耳然俗眼未免懸情
更望倍加保練王氏博濟方中有一虎骨散及
威靈仙丸此仙方也僕屢用治臂病其效如神
切望合喫元用虎頸骨誤寫作腦骨千萬相信
便合服必效自餘都下有幹望示及惠及名茗
已捧領感刻感刻東林寺碑旣獲結緣三寶業
障稍除可得托名大士皆所深願但自別後公
私百冗又無頃刻閑不敢草草下筆專在下懷
惟少寬限也

二

古人字體殘缺處多美惡真僞全在模刻之妙
根尋氣脉之通形勢之所宜然後運筆虧者補
之餘者削之隱者明之斷者引之秋毫之地失
其所體遂無可觀者昔王朗文梁鵠書鍾繇鑄
謂之三絕要必能書然後刻况復摹哉三日常
相爲利害則吾文猶有望焉耳

與靈隱知和尚

密州

某啓久留錢塘寢食湖山間時陪道論多所開
發至於靈山道人似有前緣旣別經歲寤寐見
之蓋心境已熟不能遽忘也及余簿來并天竺
處得道俗手書近百餘通皆有勤勤相念之意
人皆云杭民亦未見忘無狀何以致此蓋緣業
未斷故耶會當求湖明一郡雷連數月以盡平
生之懷卽日法履何似尚縻僧職雖不愜素尚
然勉爲法衆何處不可作佛事某到此粗遣已
百餘日吏民漸相信盜賊獄訟頗衰且不煩念
及未間慎愛爲禱不宣

與泉老

惠州

某啓今日忽有老人來訪姓徐名中鬚髮如雪
云七十六歲矣示兩頰雖非奇特亦有可觀予
然一身寄食江湖間自傷身世潜然出涕不知
當死誰手老夫自是白首流落之人何暇哀生
然亦爲之出涕也和尚慈悲普救何妨輟叢林
一席之地日與破一分粥飯養此天窮之士盡
其天年使不僵仆道路豈非教法之本意乎請
相度一報如何卽令人製衣物去此人雖不審
其信行然決是讀書應舉之人垂死窮途之士

百念灰冷必無爲惡之理幸望慈憫攝受不罪
不罪

與言上人

黃州

去歲吳興倉卒爲別至今耿耿譴居窮陋往還
斷盡遠辱不遺尺書見及感忤殊甚比日法履
佳勝扎翰愈精健詩必稱是不蒙見示何也雪
齋清境發于夢想此間但有荒山大江修竹古
木每飲村酒醉後曳杖放脚不知遠近亦曠然
天真與武林舊遊未易議優劣也何時會合一
笑惟萬萬自愛

答蜀僧幾演

翰林

幾演大士蒙惠蟠龍集向已盡讀數開迺詩迺
交筆力奇健深增歎服僕嘗觀貫休齊已詩尤
多凡陋而遇知得名赫奕如此益時文凋敝故
使此二僧爲雄強今吾師老於吟詠精敏豪放
而汨沒流俗豈亦有幸不幸耶然此道固亦澹
泊寂寞非以靳人知而鼓譽也但鳴一代之風
雅而已旣承厚貺聊奉廣耳

答開元明座主

黃州

久別思企不忘辱書具審法履安勝爲慰賢上

人前年來此尋往金山多時不得消息不知今
安在也石橋用工初不滅裂云何一水便爾敗
壞無乃亦是不肖窮蹇所累耶何時復相見千
萬保愛

二

黃州

開元大殿非吾師學行人神響應安能便成可
喜可喜此書附聖傳塗中更不封勿訝勿訝

三

離黃州

奉別累年舟過境上懷想不忘遣人惠書知法
體安穩感慰兼集咫尺無由往見萬萬自愛

四

離黃州

石橋之壞每爲悵然吾師經營非不堅盡當由
窮蹇之人所向無成累此橋耶知尚未有涯但
勿廢此志歲豐人紆會當成耳僕已得請居常
州暫至南京卽還南也知之

五

離黃州

中前經過幸聞清論深欲還日再上謁以數相
知約在棲賢且自德安徑赴之遂成食言悚息
不已比日法體何如拙詩一首聊以記一時之
事耳不須示人切祝切祝

東坡二
六

離黃州

久復一見甚以爲慰泥雨遠煩瓶錫不克款語
但有感怍乍遠千萬保愛

七

離黃州

近過南都見致政太保張公公以所藏禪月羅
漢十六軸見授云衰老無復玩好而私家畜畫
像乏香燈供養可擇名藍高僧施之今吾師遠
來相別豈此羅漢契緣在彼乎敬以奉贈亦太
保公之本意也

八

赴定州

辱簡并惠扇碑及借示木石等皆佳妙但去長
物爲陸行計無所置之謹留筆一束以領雅意
餘回納不訝不訝

九

赴定州

辱書具審法履佳勝且知從者嘗至符離見待
久之感愧深矣借示跋尾石刻足見存誠篤至
却附來人納上元本未會集間千萬珍重

與無擇老師

黃州

吾師要寫大字特爲飲酒數杯只用尋常小筆
作二額八字者可入石六字可上碑兩旁刻年

東坡二錄 卷二
月日及官位姓名字小不稱大伽藍示及大筆
皆市人用者不可使也惠及奇菽感服之至

與清隱老師

俱黃州

黃長生人來辱書承起居佳勝爲慰示及黃君
佳篇及山中圖刻欲令有所記述結緣淨境此
宿所願也但多病久廢筆硯里中故人屢有求
詩文者皆未能副其請也千萬勿訝

淨因之會茫然如隔生矣名言絕境寤寐不忘
何日得脫纓絆一聞笑語思渴思渴

與浴室用公

翰林

去鄉久不復相聞知得來示及退翁書乃審公
正信法子而吾先友史彥輔十三丈之甥也又
承寄示正信偈頌塔銘感歎不可言比日法體
勝常知長講起信自講入禪把攬放船甚善甚
善輒題數句塔銘後以補闕逸未卽相見千萬
爲法自重大雪後手凍不復成字

與大别才老

黃州

專人來辱書伏承法體清勝甚慰想望山門虛
寂長夏安穩燕坐湛然得無所得無緣面話惟

萬萬自重

昨日辱訪冗迫未遑詣謝領手教具審法履勝常爲慰語錄蒙借開發蒙鄙爲惠甚厚

三

衰疾無狀衆所鄙遠禪師超然絕俗乃肯惠顧此意之厚如何可忘還山以來道體何如相見杳未有期日深馳仰寒凝爲衆自重

答龜山長老

潁州

忽辱書感慰無量此日法履佳否名爲實實學者之意師何用此重煩示論過當未緣展晤千萬爲衆自重

二

張君子都尉聞是舊檀越爲奏海照之號今託林承議附納敕牒請作一書致君子貴知到也本欲爲書海照堂大字作碑納去屢寫皆不佳不可用非久待告文安國爲作篆字也

三

奉別忽半年思仰無窮此日履茲餘寒法體何如側聞居山漸久道俗嚮服新命旣下想慰衆

意未瞻奉間千萬以時自重

四

前者過謁雖不款畱然開慰已多矣辱書審聞
別後法履清勝山門久隳經始爲勞然龍象所
在淮山已自改觀矣未期會集幸爲衆自愛

答清涼長老

揚州還朝

昨辱佳頌見貺足爲衰朽之光未緣面謝

與僧隆賢

俱惠州

某慰疏言不意寶月大師宗古老兄捐衆示化
切惟孝誠深至攀慕涕泗久而不忘仍承已畢

大事忽復更歲觸物感慟奈何奈何某謫居遼
夏無由往莫追想宗契之深悲愴不已惟昆仲
節哀自重以副遠誠謹奉疏慰不次謹疏正月
日趙郡蘇某慰疏上

二

舟榮二大士遠來極感至意舟又冒涉嶺海尤
爲愧荷也寶月塔銘本以罪廢流落恐玷高風
不敢輒作而舟師哀請誠切故勉爲之也海隅
漂泊無復歸望追懷疇昔永望悽斷

代夫人與福應真大師

黃州

久不聞法音馳仰殊深即日遠想起居安穩兒
從夫遠謫百念灰滅持誦之餘幸無恙何時復
見一洗嶺瘴春寒千萬爲法自重不宜旌德縣
君王氏兒再拜

捨幡帖

祖母蓬萊縣太君史氏繡幡二其文曰長壽王
菩薩消災障菩薩祖母沒三十餘年而先君中
大夫孝友之慕至老不衰每至忌日必捧而泣
今先君之沒復二十四年矣某以謂寶藏於家
雖先君之遺意而歸誠於佛蓋祖母之本願乃

捨之金山以資冥福

付龔行信

惠州

辯禪師與余善常欲通書而南華淨人皆爭請
行或問其故曰欲一見東坡翁求數字終身藏
之余聞而笑曰此子輕千里求數字其賢於載
山姥遠矣固知辯公強將下無復老婆態也乾
明法煑訶梨勒聞之舊矣今乃始得嘗精妙之
極豈非中有曹溪一滴水故耶偶病不得出見
書此爲謝

東坡先生集

卷二十一

三

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一

東坡先生集卷二十一



